

顏魯公集

冊三

讀書公案

卷一

顏魯公文集卷九

寧鄉黃本驥仲良編訂

湘陰蔣 瓌維揚參校

神道碑銘二

朝議大夫贈梁州都督上柱國徐府君神道碑銘

自古遭聖明而功不立都卿相而名不稱者蓋有之矣其或荷不構而繼志不忘在下位而能伸其道克揚前烈以承後昆其唯徐君乎君諱秀

唐書宰相世系表作琇

東海鄒人也其先出於伯益實掌舜虞裔孫偃王躬行仁義遂因國命氏焉厥後樂以文侍金門穉以禮優塵榻僊人寄傲於賢聖偉長首冠於應劉英達相仍有自來矣宋有中書侍郎達之司空羨之兄祕書監欽之欽之子尚書僕射中書令湛之湛生黃門侍郎聿之聿之生齊太尉孝嗣孝嗣生梁侍中緄緄生陳五兵尚書君敕君敕生丹陽尹溫自司空已還四爲上公五降帝女尹生隋

民部侍郎唐贈祕書監諱恕監生金紫光祿大夫右散騎常侍兼禮部尚書諱

筠尚書生庫部郎中萬年令太子詹事諱昕

宰相世系表云孝嗣生齊侍中緄生陳常侍君數君數生隋通事

舍人榮榮生尚食直長恕生春官尚書枝江公筠筠生昕

皆以盛德濟美垂於世家君卽詹事第三子也

幼而聰悟篤學能屬文事繼親以孝稱十餘歲時父友鳳閣侍郎姚元崇示君

五百字詩一覽便誦姚公奇之因謂納言狄公曰徐子珠華玉潔後但不知命

何如耳年十五爲崇文生應舉考功員外郎沈佺期再試東堂壁畫賦公援翰

立成沈公駭異之遂擢高第調補幽都縣尉充相國尚書趙彥昭朔方節度判

官以事去職又歷蔡州參軍爲御史宋遙關內覆囚判官公銳精鞠訊多所全

活宋公以爲言公正色謂之曰僕從祖父司刑卿天授中詳理冤獄振雪者七

十餘家今子孫猶困於襄陵豈忍以東溼之事以自便也因頓首請去宋謝而

留之無何或訟冤於執事者召公問狀則他判官之爲也宋欲別白旌公公曰

僕雖不材豈可藉人之過以爲己功乎論者休之戶部侍郎徐知仁請爲招慰

南蠻判官奏課居最轉瀛州司法參軍侍御史趙頤貞辟宣慰判官歷湖州德

清長城潤州丹陽三縣令天寶二載春二月加朝散大夫敕攝新安郡別駕採

訪使齊澣梁昇卿並奏爲判官六載秋七月拜臨淮郡長史加朝請大夫九載夏四月除濟南郡司馬加朝議大夫十二載春三月拜信都郡長史不幸感疾天寶十三載秋七月九日終於郡之官舍春秋七十公先世塋隴宅於京師少陵原詹事府君巡按河南薨於洛汭葬於緱氏縣西南大寇原公啓手足也顧命其子今侍御史續曰吾家代儉約不欲華衆歸全之後其以布車一乘虔祔先塋續泣而奉之及其葬也塋小無便地於次東馬鞍山下得紫龍飲乳岡之原龜筮從也夫人南陽縣君樊氏戶部尙書子蓋之曾孫袁州刺史文器之孫廬江太守季節之女仁孝柔明爛於禮度左右圖史雅善琴碁中外孤弱躬自收視俾夫遠近咸懷安之春秋六十有八棄堂帳於相州之安陽天寶十五載秋八月十有四日爰遵周公之典而合祔焉禮也廣德二年春二月皇帝有事於南郊追贈君都督梁州諸軍事梁州刺史夫人南陽郡太君蓋以續簪白筆於赤墀董材賦於巴漢是用有永錫之寵紆褻崇之命哀榮之盛不其至矣君凡四爲綱佐六奉使軒所至之邦必聞異績舉天下之政事莫不資折中焉性

嗜清貧室無長物孤癯叢萃皆仰於君既嬰沈痼之疾繇歷三載續請就上國之醫庶其逢吉君曰闔門之資者寸祿也今疾劇命也吾不以一身易百口竟

不從而沒識者哀之或謂君曰君奉養嫠姊用度萬錢

闕一字

一棖諸姑繚纒五兩

姑見君

闕三字

笑而不答退謂續曰吾見其撫孤不見其怨德教義之士有以見

其用心也君恬淡寡欲雅好攝生在新安或指靈叟於洞君齋心四日采入其

阻而後覲之訊其由來陳思王東閣祭酒蔣覲也說魏時事歷歷可聽君稽首

而斲之叟曰從我乎必可度世君以王事靡盬退而辭焉比迴顧則爲茅草矣

初君上計濟南展羣祖之墓松檟森然微猷莫紀留居論譟時日以成先德之

不忘繫是舉也嗚呼君體聰穎之上姿恬曠之夷度寬明足以濟衆和義足以

長人口絕莠言目無還視立身先張仲之志與朋服子路之言內行可以質神

明清規可以勵風俗宜克享胡耆荷天之龍光輔乎漢之得人高視乎周之列

位而道之將喪命不偶時屈輿驥於身前墮峴碑於沒後吁足數也春秋貴九

世卿族漢史稱七葉珥貂陪臣於下士卑僚絕屬於天潢戚里豈比夫登台者

四世尚主者五人焜耀於數朝之間蟬聯於百代之下可同年而語矣續懿文
懋學峻節清標天寶末陷居賊中爲僞命連辟辭疾不起謀使家人與本朝通
計爲部曲所發遂遭禁詰一日之中議刑者數焉俄而官軍大至賊黨奔北由
是獲免乾元中奉使巴渝屬段子璋構逆流輩十人皆被屠害以續高名欲留
同惡期之以死承劍不回時諸道徵求人不堪命續至之邦必荷仁信如期而
畢則闕三字將崇必復之矣寧止當朝之望碑銘功伐敢墜斯文辭曰

益爲帝虞偃不異途世表東海其惟徐乎或文或武或哲或儒休美後昆厥德
不孤猗那都督克懋遠圖邦國四佐輶軒六徂樹聲長世與道爲徒爰覲幽光
無寧集枯闕八字仁義都盡彭殤曷殊所嗟人紀莫展嘉謨馬鞍山北龍乳岡隅

於焉崇祔先志靡渝豐碑崔嵬宰樹縈紆

闕六字

沾濡

闕八字

金紫光祿大夫守太子太傅兼宗正卿贈司空上柱國隴西郡開國公李

公神道碑銘

昔周武以二公股肱王室然而允釐西土師保萬民者其惟召公乎漢室以二

傳羽翼儲宮然而亮采東朝儀型百辟者其惟蕭傳乎則九德之師六行之傳親賢既美亦何代無其人哉隴西公才爲國之垣翰位爲天子之喉舌德爲朝之元老行爲帝之信臣蓋所謂宗室之間生士林之傑出者也公諱齊物字道用隴西成紀人自若水導其靈源而聖人作高邱峻其層構而才子生元元爲宋帝之先興聖有勤王之舉盛德彌於百祀靈根固於千葉太祖景皇帝功高佐魏慶始封唐家崇八柱之勳地半三分之業亦猶殷人之祖契周室之宗文公卽景皇帝之五代孫也鄭王亮之元孫淮安王神通之曾孫淮安王皇朝開府儀同三司尚書左僕射贈司空磐石開府介圭錫瑞成周之晉鄭西漢之勃平祖孝銳鹽州刺史父璟隴州司倉贈弘農太守並清白貽範仁賢繼軌連華公族濟美專城公稟乾剛之正性體坤順之中德爰自岐嶷特鍾美秀儼然王公之量鬱有台鼎之姿固已超等夷而出羣萃矣神龍初起家左右千牛備身歷尚輦直長許州司馬華州司兵時方振拔勢已飛騰此則江漢之濫觴華嵩之覆簣也丁太夫人憂公有至性毀瘠過禮扶杖於家哭不絕聲者累月倚廬

於墓衣不解帶者終喪天子特降璽書就廬慰勉非常之澤近古未聞服闋授
鴻臚丞除尙輦奉御遷北都軍器監事太原爲一都之雄鎮軍器掌五庫之禁
兵故乾沒之賊一徵百萬繕完之利費省巨億少尹嚴挺之連奏課最擢拜長
安令陸海殷湊五方浩劇公以威禁暴以恕用刑邑里之人陶然大化遷將作
少匠殿中少監太府少卿懷陝二州刺史雖漢之宗室不典三河而周之懿親
先分二陝惟良之寄實在於公嘗以黃河經砥柱之艱有覆舟之患遂奏疏九
派鑿三門屬役而堅冰大合興功而烈火潛熾不愆於素若有神焉人皆以公
至誠之所感也又於石樓古銘曰平陸遂以名縣焉玄宗異之賜貂裘一領絹
三百匹特加銀青光祿大夫鴻臚卿并公之先隴州府君專城之贈上嘗賜玉
尺一詔曰謂之尺度可以裁成卿實多能故爲此賜識者知公必將金玉王度
代天之工豈惟從容九列而已拜河南尹仍兼水陸運使屬左相李公適之尙
書裴公寬京兆尹韓公朝宗與公爲飛語所中公遂貶竟陵郡太守時陸羽鴻
漸隨師郡中說公下車召人吏告之曰官吏有簠簋不修者僧道有戒律不精

者百姓有泛駕蹶弛者未至之前一無所問而今而後義不容數年間一境
丕變熙然若羲皇之代矣哀孤重老有隱逸好道者常騎馬於里巷之中親自
恤問量移安康卽日上道老幼遮擁不得發者三辰轉漢陽斬春其政如一公
虛中自牧接下愈恭與物盡推誠之心正身無氣馘之忌每上春行令大戶閱
農輕裹餼糧重煩縣道化流江漢如時雨焉故郡歷數四課事第一去思之感
人到於今稱之天寶末徵拜將作監重授鴻臚卿縱壑巨鱗還游舊浦凌風勁
翮俄返故林時國忠包藏於內

下闕

朝議大夫守華州刺史上柱國贈祕書監顏君神道碑銘

永泰元年

君諱元孫字聿修京兆長安人高祖諱之推北齊給事黃門侍郎待詔文林館
曾祖諱思魯隋太子校書東宮學士皇朝秦王記室祖諱勤禮著作郎崇賢弘
文兩館學士父諱昭甫高宗侍讀曹王屬贈華州刺史俱以德業才名相望史
冊君卽華州之元子少孤養於舅殷仲容家身長六尺二寸聰銳絕倫工詞賦
章奏有史才明吏事年十歲時叔父吏部郎中敬仲任益府法曹長史李孝逸

聞君少俊請與相見座中試安石榴賦君默綴少頃郎中聘而從之君授翰立就不加點竄孝逸大驚尤善草隸仲容以能書爲天下所宗人造請者牋盈几輒令代遣得者欣然莫之能辨舉進士素未習尙書六日而兼注必究省試九河銘高松賦故事舉人就試朝官畢集考功郎劉奇乃先標榜君曰銘賦二首旣麗且新時務五條詞高理贍惜其帖經通六所以不

原本闕

屈從常第徒深悚

忤由是名動天下解褐鼓城主簿歷登封尉與弟贈太子少保諱惟貞府君調選屢以高等同登甲科相代爲長安尉翰林偉之前是老更好以婚田之不決者試新上官君悉堦階上研墨汁數

原本闕

操割凡百餘道不終夕而畢縣令隴

西李綰才學士也覩

原本闕

駭命小吏分守寫之而通不給朝廷聳歎遷洛陽丞

著作佐郎太子舍人時玄宗監國獨掌令誥當時以爲綸言之最嘗有命召或以次進

原本闕

今日非也聞公喚長舍人來遂御小殿賜食因出諸家書跡數十

卷曰聞公能書可爲寡人定其真僞君分別以進上玄宗大悅因賜藤牋筆墨衣服等物嘗和遊苑詩御札八分批答云孔門入室魯國稱賢翰墨之妙莫之

與先君一覽無遺兼該故實韋安石以宰相兼庶子特相禮重官務一以諮君
事頗填委從駕至

原本闕

以司直用事命坊官同遊石龕寺駐焉諸君有忌前者

曰顏舍人必不行已而君辭以遽曰果爾何爲妄請君默然元宗登極同列皆

選中書舍人君讓范陽盧備俄爲琚等所擠出爲潤州長史遷滁州刺史按察

使王志愔以清白名聞拜沂州志愔娶於顏餘慶以男求婚君拒之遂誣奏請

降階奪祿其初君與執事者因

闕一字

官有忤至是憾焉遂黜歸田里君屏私第

傲然無悶者十年與陳郡殷踐猷上谷寇泚武功蘇晉吳郡陸象先友善相見

未嘗不畢景起爲濠州刺史累加朝議大夫上柱國中書令張嘉貞深相器重

方引知制誥

原本闕

右職屬罷相不行代到風疾停家開元二十年秋七月才生

明薨於絳州翼城縣丞之官舍隨子春卿任也明年葬於東京鷄店東北高村

原夫人新城縣君元氏故北異穴而塋權也文集三十卷著千祿字書一卷並

行於世續祖父涉令光庭注後漢書常山之陷也沒焉廣德二年春三月二十

有二日制曰故濠州刺史上柱國顏元孫懿道淳茂宏材特達傳經成業聚學

爲文清白著於家風問望光於銓選久膺揚歷爰寄藩條政有其方續宣其用
未登大任遽迫流年九原不作郡邑存其遺愛二子象賢艱難立其名節忠能
徇國孝在榮親贈以儒官揚其盛烈可贈祕書監真卿表謝今上批答云卿之
先伯當代詞宗道蘊國經行推人表上宏祖德下獎門閥鄭國不亡臧氏有後
雖雲雨之澤自葉流根然訓誨之方因父見子永惟盛烈式寵代官不朽者名
斯爲極矣嗚呼君有五子皆有才名春卿聰銳無比早擅詞賦尤工表檄倜儻
有吏能急人之急明經拔萃歷蜀縣尉長史蘇頲舉茂才異等未試充張敬忠
節度判官轉翼城丞與弟杲卿曜卿從父弟允南調選同日於銓庭爲侍郎席
建侯所賞授偃師縣丞杲卿忠烈方正精敏有識累至魏州錄事參軍清白名
聞充安祿山營田及度支判官太常丞攝常山太守祿山反誅其土門使及

闕

拜衛尉卿兼御史中丞城陷詢置爲賊所屠害乾元中贈太子太保諡曰忠

原本

節曜卿介直以信稱勤學好屬文工草隸書十五以文學直崇文館每選集必
爲主司所賞擢歷城丞淄川司馬旭卿美姿儀善草書允山令茂曾仁恕和厚

口無擇言頗屬文詞留心詁訓嘉陵司馬孫紘少好雜書疎財重義方義尉鮮于仲通節度劍南引爲判官同征閣羅鳳沒於蠻泉明穎悟孝義果銳爛於吏道安平尉父敬保

父敬保字疑是太保之譌
果卿贈太子太保故云

將開土門使與長史袁履謙往來

謀議授左金吾兵曹尋爲賊所執舉家見陷泉明到河北乞求贖先姑女而後

己子行路哀之東京收復泣血求父屍獲焉時人以爲孝感所致拜郾令有能

名爲崔光遠所擠終彭州司馬威明太僕丞邛州司馬李明惇敏有容止與君

外孫盧逖同爲賊所害贈左贊善濬勤學好屬文早卒子幹剛銳強力公劉府

果毅弟沛同遇賊害贈都水使者沛尚食奉御翹入道詔

詔當從家廟勤禮二
碑作翹果卿之姪也

與泉明子誕同質於祿山皆被鋸殺贈贊善誕義王諮議翹通義令覲漢州參

軍覲鹽亭尉翹未仕曾孫澄右內倉曹訊兵曹詔彭王參軍皆承謀翼不敢

失墜爲君德盛才茂行周業廣文可以經國道可以致君而坎壈盛明不登弼

亮其時歟其命歟真卿越自嬰孩特蒙獎異且兼師父之訓豈獨猶子之恩濡

筆告哀不申萬一銘曰

琅琅世父明德是矩孝以仁親忠期輔主周旋禮法精究訓詁行楸珪璋文彪

龍虎高標天府震耀區寓前載

原本闕

千官歛覩王畿就列赤縣斯偃杖華交輝

灑翰如雨洛陽毗貳著作布武載筆龍樓

闕一字

光龜組元宗褒異

闕一字

發傳伍

不入掖垣翻飛江潯淮沂其乂典憲斯侮望閑爰歸優游不吐名公虛左濠上
爰撫方俟同昇遽愆多祜一麾屢黜百贖奚補翼子多方教忠則膺吁嗟太保
爲國干櫓取義舍生悲今邁古皇恩自葉超贈祕府存沒哀榮幽明赫眎真卿
追痛銜恤靡怙牽綴銘功恨非覲縷

特進行左金吾衛大將軍上柱國清河郡開國公贈開府儀同三司兼夏

州都督康公神道碑銘

永泰二年二月

竭誠奉主之謂忠率義忘躬之謂勇忠勇不犯則名登於明堂子仕教忠之謂
慈戰陣能勇之謂孝慈有裕則道存乎方冊兼此四者其惟清河公之族乎
公諱阿義屈達干姓康氏柳城人其先世爲北蕃十二姓之貴種曾祖頡利部
落都督祖染可汗駙馬都知兵馬使父頡利發墨啜可汗衛衙官知部落都督

皆有功烈稱於北陲公卽衙官之子也正直忠鯁以信行聞爲國人所敬長於謀略工騎射其弓十鈞年二十三爲阿史那頡佚施默啜等九可汗宰相秉心顓一立言無二不吐剛以茹柔必蹈道而履義可汗每有過失未嘗不極言切諫蕃落中重焉以比國家之丞相宋璟初默啜弟拔悉密時勤嘗擊藥弑可汗公竊而藏之密持示默啜默啜大怒將誅之公以爲請但令歸於部落默啜知公至忠絲是益加親信同列四人莫與公比其後公以孤直屢見疑譖遂請退歸可汗察公非罪尋復追爲宰相先是毗伽可汗小殺爲其大臣梅錄啜所毒小殺覺之盡滅其黨旣卒國人立其子伊然可汗無何病卒又立其弟登利可汗華言登利猶果報也其母噉欲谷之女與其小臣飫斯達干預國政登利從叔父因左殺右殺東西分掌其兵馬登利與其母誘斬西殺盡并其衆左殺懼及乃攻殺登利自立爲烏蘇米施可汗拔悉密擊敗之脫身遁走國中大亂天寶元年公與四男及西殺妻子默啜之孫勃德支特勒毗伽可汗女大洛公主伊然可汗小妻余塞富登利可汗女余燭公主及阿布思阿史德等部落五千

餘帳并駝馬牛羊二十餘萬款塞歸朔方節度使王忠嗣具以上聞

一本忠嗣作斛

斯

秋八月至京師元宗俾先謁太廟仍於殿庭引見御花萼樓以宴之仍賦詩

用紀其事拜公左威衛中郎將屬范陽節度使安祿山潛懷異圖庶爲己用密奏公充部落都督仍爲其先鋒使公旣不得已僂俛從之四載以破契丹功遷右威衛將軍俄拜范陽經略副使五載又破契丹功居多拜左武衛大將軍仍充節度副使元宗嘉之璽書慰勉盈溢篋笥十四載冬十一月九日甲子安祿山反范陽公以天子有命陷身凶逆舉家見質自拔莫由旣至東歸公泣血籲天次於夢寐欲與諸子逃歸國家爲賊邢州刺史康節所告遂被收繫廉奏被誅者二十餘人公之四子各奔於外賊恐衆情不安貰之而後出至德二載闔門二百餘口被安慶緒脅至安陽屬今上爲天下兵馬元帥統今尙書令汾陽王郭子儀朔方之師諸節度回紇之衆東收二京公率四子及孫姪等十餘人冒死南奔至汲郡爲從者所告家人殲焉二子沒野波英俊挺身行前二子屈須彌施英正持滿殿後沒野波妻阿史那氏爲公控馬登於西山至高平界遇